

REGLUGERÐ

um hvata- og stuðningsverkefni í landgræðslu og skógrækt

1. gr.

Markmið.

Markmið reglugerðar þessarar er að hvetja til og styðja verkefni og framkvæmdir á vegum einstaklinga, félagasamtaka, sveitarfélaga, fyrirtækja eða annarra í landgræðslu og skógrækt í samræmi við 8. og 19. gr. laga nr. 155/2018 um landgræðslu og 7. gr. og IV. kafla laga nr. 33/2019 um skóga og skógrækt.

2. gr.

Auglýsingar og umsóknir.

Land og skógur skal auglýsa eftir umsóknum um stuðning samkvæmt reglugerð þessari einu sinni á ári eða eftir því sem fjárveitingar leyfa. Auglýsa skal á vef Lands og skógar, í dagblöðum eða með öðrum sannanlegum hætti. Tilgreint skal í auglýsingu heildarfjárhæð sem er til úthlutunar, styrkhlutfall til mismunandi verkefna eða verkefnaflokka og hámarksstyrkfjárhæð. Einnig skal tilgreina í auglýsingu ef Land og skógur hefur sett reglur um framkvæmd þess verkefnis sem auglýst er og fyrirliggjandi samningsform ef við á.

Umsækjendur geta verið einstaklingar, félagasamtök, sveitarfélög, fyrirtæki eða aðrir sem vinna að landgræðslu og/eða skógrækt. Umsóknum skal skila rafrænt í umsóknarkerfi.

Umsókn skulu m.a. fylgja eftirtalin gögn og upplýsingar:

- Upplýsingar um umsækjanda eða umsækjendur, aðra þátttakendur og samstarfsaðila, ef einhverjir eru.
- Lýsing á verkefninu og markmiðum þess, þar sem m.a. skal koma fram hvernig verkefnið samræmist markmiðum og skilgreindum áherslum styrkveitinga samkvæmt reglugerð þessari.
- Sundurliðuð kostnaðar- og framkvæmdaáætlun með tímasettri verkáætlun á formi sem Land og skógur útvegar.
- Önnur gögn umsókninni til stuðnings.

Umsóknum sem ekki berast innan tilskilins tímafrest í gegnum umsóknargátt er hafnað. Heimilt er að hafna umsóknum sem skilað er með ófullnægjandi hætti.

3. gr.

Styrkhæf verkefni

Verkefni sem njóta styrks samkvæmt reglugerð þessari skulu uppfylla öll eftirfarandi skilyrði:

- Vinna að markmiðum 1.–3. gr. laga um landgræðslu og/eða 1. gr. laga um skóga og skógrækt.
- Vera í samræmi við landsáætlun um landgræðslu og skógrækt, landshluta- og svæðisáætlanir, gildandi skipulag og gildandi staðla og gæðaviðmið.
- Uppfylla skilyrði varðandi leyfisveitingar, s.s. framkvæmdaleyfi o.fl..
- Umsækjendur skulu vera umráðahafar viðkomandi landsvæðis.

Ekki eru veittir styrkir til verkefna sem eru þegar á fjárlögum.

4. gr.

Meginflokkar styrkhæfra verkefna

Í töflu 1 eru dæmi um styrkhæf verkefni. Önnur verkefni geta notið stuðnings séu þau í samræmi við markmið laga um landgræðslu og/eða laga um skóga og skógrækt. Land og skógur ákveður stuðningshlutfall til einstakra verkefna og tekur meðal annars tillit til markmiða fyrrgreindra laga, stefnu stjórnvalda og fjárheimilda hverju sinni. Skal það auglýst á hverjum tíma sbr. 2. gr.

Tafla 1. Dæmi um verkefni sem geta notið stuðnings samkvæmt reglugerð þessari:

- Varnir gegn landbroti.
- Landgræðsla.
- Verndun kolefnisríkra vistkerfa.
- Endurheimt votlendis og birkivistkerfa.
- Fræðsla, vöktun og samfélagsverkefni.
- Gerð heildstæðra landnýtingaráætlana, fyrir jarðir, vatnasvið og/eða landslagsheildir.
- Hagaskógar/skjóllundir/útivistarskógar/landgræðsluskógar.

- h) Skjólbelti til að bæta skilyrði til landbúnaðar.
- i) Nýræktun skóga og skógarumhirða.

5. gr.

Forgangsöröðun umsókna.

Land og skógur gerir tillögu til ráðherra um skiptingu heildarfjárhæðar milli verkefnaflokka, styrkhlutfall til mismunandi verkefna eða verkefnaflokka og hámarksstyrkfjárhæð fyrir hvern flokk.

Ef sótt er um hærri fjárhæð en er til úthlutunar hverju sinni skal umsóknum m.a. forgangsraðað með vísan til eftirfarandi þátta:

- a) Markmið laga um landgræðslu og laga um skóga og skógrækt.
- b) Áherslur í landsáætlun um landgræðslu og skógrækt.
- c) Aðgerðir miða að stöðvun jarðvegsrofs og hnignunar vistkerfa, sjálfbærri landnýtingu, endurheimt vistkerfa eða uppbyggingu skógarauðlindar.
- d) Aðgerðir byggja á heildstæðri áætlun fyrir stór landsvæði og/eða landslagsheildir.
- e) Reglna verkefnis, s.s. hvað varðar úthlutun, framkvæmd o.fl.

Hafi umsækjandi áður hlotið stuðning eða styrk til sömu framkvæmdar skal tilgreina það í umsókn. Heimilt er að draga þá fjárhæð frá heildarupphæð styrks. Þá er jafnframt heimilt að hafna umsókn um frekari styrk ef óútskýrðar eða óhóflegar tafir hafa orðið á verkefni sem þegar nýtur styrks.

6. gr.

Mat á umsóknum.

Land og skógur tekur ákvarðanir um styrkveitingar á grundvelli faglegs mats á framkomnum umsóknum. Til þess getur stofnunin aflað upplýsinga frá opinberum aðilum.

Við mat á umsóknum og ákvörðun um úthlutun er jafnframt heimilt að taka tillit til eftirtalinnna sjónarmiða, eftir því sem við á:

- a) hvort og hversu vel verkefni falli að skilgreindum áherslum styrkveitinga eins og þær eru auglýstar hverju sinni,
- b) forsendur og mikilvægi verkefnis og hvort verkefnið sé líklegt til að hafa í för með sér umhverfislegan ávinning,
- c) hvort markmið verkefnis séu skýr og raunhæf, hvernig markmiðum sem að er stefnt verði náð og hvernig árangur verkefnis verði metinn,
- d) hvort verkefnið sé byggt á faglegum grunni,
- e) eigið framlag umsækjanda eða annarra til verkefnis,
- f) hagnýti verkefnis og hvort verkefni sé atvinnuskapandi,
- g) fjárhagsgrundvöll verkefnis,
- h) upplýsingar um samstarfsaðila.

Ákvarðanir um veitingu styrkja eru teknar af Landi og skógi í samræmi við gildandi lög og reglur. Um málsmeðferð við ákvarðanir um veitingu styrkja gilda ákvæði stjórnsýslulaga nr. 37/1993.

7. gr.

Afgreiðsla styrkja

Styrkþegi skal skila framkvæmdaskráningu til Lands og skógar að loknum framkvæmdum hvers árs. Verkefnið skal vera unnið í samræmi við skilyrði styrkveitingar og unnið skal í samræmi við áætlun og úthlutun. Framkvæmdaskráning er forsenda greiðslu framlaga vegna allra verkefna sem njóta stuðnings samkvæmt þessari reglugerð.

Við upphaf framkvæmdar sem telst styrkhæf er heimilt að greiða allt að 50% af samþykkttri styrkupphæð og eftirstöðvar við skil á gögnum, upplýsingum, lokaskýrslu eða úttekt.

8. gr.

Samningar

Land og skógur gerir samninga við styrkþega um framlög til samstarfsverkefna áður en til framkvæmda kemur samkvæmt ákvæðum laga um landgræðslu og laga um skóga og skógrækt. Lengd

samninga um stuðning við verkefni skal almennt taka mið af framkvæmdatíma en með eftirfarandi undantekningum:

Samningar um skógrækt á lögbýlum skulu að lágmarki vera til 40 ára sbr. 11. gr. laga um skóga og skógrækt.

Samningar um endurheimt votlendis skulu vera að lágmarki til 20 ára.

9. gr.

Upplýsingagjöf styrkþega.

Skilyrði greiðslu stuðnings er að verkefni hafi verið unnið í samræmi við úthlutun og/eða samning.

Styrkþega er skylt að tilkynna Landi og skógi tafarlaust ef upp koma aðstæður sem seinka styrktu verkefni eða koma í veg fyrir að markmiðum eða skilyrðum fyrir styrkveitingu sé fullnægt.

Styrkþega ber ávallt að verða við beiðni Lands og skógar um upplýsingar um stöðu verkefnisins og láta stofnuninni í té allar upplýsingar og gögn um verkefnið, þar á meðal bókhaldsgögn.

Styrkþegi ábyrgist að styrk verði einungis varið til þess verkefnis sem getið er um í umsókn. Jafnframt skuldbindur hann sig til að skila viðeigandi gögnum og upplýsingum til að njóta fulls stuðnings. Styrkþegi skal auk þess hlíta öðrum þeim skilmálum sem fram koma í reglugerð þessari eða eru sérstaklega tilgreindir í úthlutunarbréfi eða samningi.

10. gr.

Árangursmat.

Land og skógur skal meta árangur verkefna sem njóta styrks samkvæmt reglugerð þessari. Mat á árangri skal vera í samræmi við 10. gr. laga um landgræðslu nr. 155/2018 og 8. gr. laga um skóga og skógrækt nr. 33/2019.

11. gr.

Eftirlit og endurkröfuréttur

Land og skógur fer með eftirlit með framkvæmd verkefna sem njóta styrks samkvæmt reglugerð þessari og skal stofnunin setja sér reglur um framkvæmd eftirlits. Við eftirlit skal m.a. lagt mat á hvort staðið hafi verið með fullnægjandi hætti að framkvæmdum með hliðsjón af umsókn.

Styrkþegi skal endurgreiða greiddan stuðning komi í ljós að stuðningur sem greiddur hefur verið hafi ekki verið nýttur í samræmi við úthlutun. Uppfylli umsækjandi ekki skilyrði greiðslu vegna seinni hluta stuðnings vegna ófullnægjandi framkvæmdar eða skila á gögnum eða annars þess sem leiðir til að verkefnið er ekki unnið í samræmi við forsendur úthlutunar, sbr. 5. gr., skal hann endurgreiða fyrri hluta stuðningsins sem hann hafði áður fengið greiddan.

Ef styrk eða hluta hans er varið í annað en það verkefni sem tilgreint er í umsókn eða ef skilmálar í reglugerð þessari eru ekki uppfylltir teljast forsendur styrkveitingar brostnar. Áskilur Land og skógur sér þá rétt til að ógilda styrkveitinguna og krefja styrkþega um endurgreiðslu á greiddum styrk, að hluta til eða í heild sinni, ásamt kostnaði.

12. gr.

Gildistaka.

Reglugerð þessi öðlast þegar gildi.

Ákvæði til bráðabirgða:

Þegar gerðir samningar sbr. IV. kafli laga um skóga og skógrækt halda gildi sínu í samræmi við ákvæði þeirra.